

吳王張士誠載記

一函
五冊

吳王張士誠載記

卷三 附編 附傳

泰縣韓止叟鑒定

旌德任致遠述

附傳

吳王母曹氏

曹氏吳王張士誠母賢明有智略嘗命士誠降元以圖朱吳以子九六爲朱吳王所擒又與和未遂常鬱鬱不樂士誠稱王因上尊號爲王太妃未幾卒葬蘇州盤門外朱吳軍規取平江時預戒將士慎勿侵發太妃墓吳人至今稱爲娘娘墳

吳王妻劉氏 附金姬

劉氏張士誠妻士誠降元元授以太尉封劉氏一品夫人逮士誠稱王乃進號吳王妃妃知大義崑山郭翼字義仲嘗上書論事詞旨激切吳王怒欲殺之妃力諫曰郭生策亦未爲非縱不能用宜善待之乃止翼以是得亡去後朱吳軍進圍姑蘇王數戰皆敗知大事已去顧謂妃曰

我敗且死矣若曹何爲妃曰君勿憂妾必不負君遂積薪齊雲樓下及城破驅羣妾侍女等登樓趣令自盡又令養子辰保縱火焚之已亦自縊死有幼子年六歲舊將周國俊匿出逃民間未及於難後冒姓周氏

附 金姬姓李氏名金兒李素女章邱人明敏妙麗世罕其儔日誦古今經史及醫卜百家之書倍極元妙會元室政亂至正甲午吳王兵陷泗洲姬父素一家悉被擄時姬年未及笄分配曹太妃帳中太妃知其通經典醫卜頗愛之元脫脫兵圍高郵勢甚危急妃命姬卜之吉後果縱擊大破之益寵愛有加父母皆留幕下明年乙未江陰朱英來降勸士誠取常熟意未決言於其妻劉氏同召姬卜姬以星象勸止曹太妃復強之卜乃請扶乩占得詩有待看日月雙明照殺盡不平方太平語聞於士誠大喜方改歷明時以爲符讖決計渡江遂入常熟進襲蘇州下之以二月二十五日發高郵至通州期三月三日渡江入吳三月朔奉其母曹太妃登狼山觀長江之險心憚之乃召姬問卜姬青衣跣足垂涕而出對太妃曰妾本俘獲子女罪當萬死初見主公安敢妝飾士誠凝立忘言注目諦視再三遣去易常服出拜曰象緯著龜之占乃出聖賢故古之卜者法天地象四時順於仁義分策定卦按式正某然

後言天地之利害人事之成敗此天下之重事不敢不敬也故古之聖王建國受命未嘗不寶卜筮以助善越王勾踐倣文王八卦占辭象體用范蠡文種爲謀臣而推遠西子故能破敵國而霸天下桀紂之時與天爭功壅遏鬼神使不得通又用趙梁左疆以爲謀臣寵姐己妹喜以爲內嬖卒使蔽其耳目以亡其國此皆經史所著至今不敢忘也士誠曰蘇州地方百里四面皆非我有元末革命人心反側將奈之何對曰軍國大事非兒女子所能預知今蒙主公再生之恩老夫人解衣推食之愛不敢不昧死以對竊聞創業開基與守成之主不同非仁與義無以收四海臣民之望非才與智無以服天下英雄之心天下神器也可以智力取而不可以智力守可以羣策謀而不可以與羣策斷是故君德莫善於運乾剛之斷莫不善於任匹夫之勇守成且然而況創業之君乎今日江南政乖民困徵賦煩劇威力迫脅萬姓離心久矣主公以江淮先聲士卒効命乘破竹之勢南定嘉湖北撫淮泗鼎足千里不過一投鞭之勞耳然聞江南捷至子女玉帛盡入私門府署官爵已皆濫給損舉義伐暴之名失厲世賞功之柄政教號令出非一門入吳之後方將爲國家深慮耳時姬初見士誠察其意有所屬每答問輒高其論盛陳綱紀約其邪思士誠悚然改容又欲知國祚修短自起

焚香再拜祝著卜之得中孚之晉曰日月運行一寒一暑榮光赫赫創業大數當伺天運一周乃決國祚靈長將與日月並明矣士誠又曰今卽渡江聞汝善詩能有言以作士氣乎收庭中列幟置姬前姬立綴詩於上曰萬隊旌旗臨北斗連江笳鼓動雄風君王自欲觀朝日驅石行看到海東退告其父曰一寒一暑天運一周也歷以十二辰爲一紀自今起丙申後十二年丁未須別有真人當其榮光者矣適元室招降曹太妃意主歸命陳友諒遣使乞師姬勸乘衅取江陰長興爲自立計士誠允之而不果行初士誠見姬於狼山軍旅爲其危言所恐心竊敬畏未敢有他念姬旣居吳久至是遂欲以爲妃僞召使卜意欲姬自爲卜吉也卦成得大畜之觀乃自起取桃花簪其鬢笑曰以此爲聘姬曰吾卜吉凶別然否多中昔晉獻公貪驪姬之色其禍竟流五世主公方將受命而王奈何效其所爲不聽使參軍王敬夫撰冊金姬詞且俟他日加妃號姬苦辭不可忽輕翠已覆體矣乃求往謝老夫人許之又往拜劉氏王妃又悉召其父母所親各叙訖啓其故篋出香焚之向天列拜長跪私祝衆莫測其意須臾閉目奄然無語父母驚呼已絕息矣士誠執其手哀慟不已厚營殮葬加封護國定仙妃未幾拜其父素爲隆平府丞母封夫人

隆安公主

隆安公主士誠女潘元紹妻也蘇城破自剄於盤門新橋吳民憐之且見元紹爲厲因立廟麗娃鄉祀爲土神稱駙君府廟中壖公主像言張不言潘者以明初魏觀事懼干禁也事載隆平紀事今則元紹與公主並祀矣陳葆魯有新橋剋建隆安公主祠碑記

張士義

張士義士誠弟初起兵行至丁溪被大姓劉子仁集衆拒之中矢死

張士德

張士德小字九六士誠第三弟從士誠起兵功最多江南浙西諸地皆其所略定善戰有謀能得士心元至正十六年正月淮東飢士德由通州渡江入常熟進逼平江衆纔三四千人長驅至北門緣城而上旣入城據承天寺爲行署以三矢射棟上遂陷湖州松江乃移師圍常州殺萬戶劉良薦周仁爲隆平太守吳王自高郵徙隆平定官制以士德爲平章士德以牧守者多非才悉選而更張之自令承簿尉以及錄事錄判同日命十一人人各賜衣二襲馬二匹粟若干石肥野旨酒有差尤好文學士入吳延辟無虛日網羅一時俊傑如王逢陳基俱召致幕中

眞定蘇昌齡比先避亂居吳士德用爲參謀稱曰蘇學士先是吳王旣得平江卽以兵攻嘉興元守將楊完者數敗其兵不能克乃遣士德與王與敬將兵入杭州軍氣甚銳元達識丞相歛兵退去蕭山完者還救士德三戰三敗遂還隆平丁酉六月朱吳將徐達等取江陰七月丙子攻常熟士德出挑戰兵却明日復與戰遇伏於湖橋被徐達先鋒將趙德勝所執送往金陵朱吳王喜曰士德勇略過人爲謀主今成擒張氏不足定矣時周天祐四年元至正十七年也朱吳王欲降之不屈間道貽吳王書俾降元遂不食死吳王旣降元元以爲太尉以士德爲淮南行省平章政事時已爲朱吳所獲元順帝聞之追封爲楚國公

張士信

張士信士誠幼弟卽張九七也張氏建國時國人以四平章呼之累典重兵守淮安初從兄起兵未有官階及士誠受元太尉命士信爲同知行樞密院事後陞淮南行省平章政事至正十六年士誠遣將攻嘉興士信與焉楊完者拒戰於東瓜堰士信伏水遁還十九年授士信江浙行省平章政事仍兼同知行樞密院事七月大發浙西民夫築杭城十月訖功立新碑於城塹二十二年三月士信率兵萬餘圍諸全朱吳守將謝再興拒之久戰不決旣而再興設伏城外

士信大敗憤益兵攻之會朱文忠遣胡德濟來援又颺言重兵且至夜半德濟率壯士出擊士信遂歸士信素驕侈不能撫循將士嘗自謂孫臆穰苴不能過一切省憲臣屬輒叱而奴之獨能關戟延見技士諸技士庭謁無不蛇行膝語又能招延文士陳敬初等皆爲之用以慕倪雲林名辟爲建章文幃名幕中客三以沈痼辭乃遣使進異錦寶瓶乞點染縑素雲林大怒曰吾豈

王門畫師耶裂其縑而揮其饋士信啣之嘗遊震澤忽聞奇香起葦洲士信曰此百濯香也安得有之必倪迂矣跡訪得之而甘心焉肆其掊擊客皆毛骨顫眩雲林則歛躬閉目不吐一詞同遊諸文人力解而釋其械命其刺船雲林撐篙而篙墮水土信大笑七月補刻西湖書院書籍九月代史椿鎮淮陰命員外郎陳基錢用壬同參軍事初史文炳以被誣降朱吳王謀叛事士誠詐以死聞使士信主國事誘殺之二十四年克安豐還士誠命代達識帖睦爾爲江浙行省左丞相達識乃以所掌符印并金牌等付士信卽建宅東城下號丞相府居民附之者輒得富貴飾園池蓄聲妓尤好聚積古法書名畫無不充物後房百餘人習天魔舞隊日夜歌舞自娛將帥往往效之亦偃蹇不用命不久吳王令潘平章守杭州士信回蘇湖州之役全軍倒戈而降士信僅以身免朱吳軍圍蘇州士信於西閭門督戰方會食左右進桃未及嘗中礮死

吳王子

吳王子年六歲城破後有舊將周國俊爲海鹽人與趙姚廉三將自閭門匿出渡江棲於通州從國俊爲周氏名確字伯堅族蕃衍至千餘家其世譜所載謂王更有二子避出他所爲虞吳二氏云

五太子 辰保

辰保五太子皆吳王養子五太子本姓梁短小精悍能平地躍起丈餘又善沒水久在行間元至正二十五年李伯昇攻諸全五太子率兵爲之援朱吳軍圍湖州吳王命五太子同朱暹援之屯於舊館兵敗遂降

張右丞

張右丞吳王從子國人稱爲大眼張

一稱張火眼

守狼山朱吳軍旣克蘇州卽遣李千戶率師取通

州次狼山右丞懼遂降

李行素 附子伯昇

李行素海陵人以陰陽術爲業士誠起泰州行素參與帷幄及據蘇州置官屬首以行素爲丞

相國亡俘至金陵以老得閒居卒葬伽楞山下子伯昇亦同仕吳

附 李伯昇泰州人與士誠同起事者元丞相脫脫攻高郵未下旋奪兵柄解圍去士誠突出與十八人追擊大破之伯昇其一也迨士誠受元太尉以伯昇制軍事達識帖睦爾陰圖楊完者時伯昇爲行省左丞與行樞密同知史文炳行樞密同僉呂珍合衆攻殺之朱吳將雄峯翼元帥王遇成孫茂先攻臨安伯昇往援爲雄等所敗卽歛兵自守未爲所克至正十九年癸酉朱吳將邵榮攻湖州戰不利諜知伯昇欲來攻設伏以待山上旗舉齊擊之伯昇大敗憤整軍再攻又敗朱吳軍亦引還三月攻婺州爲孫茂先所敗二十一年士誠命伯昇率兵攻長興衆十餘萬城中兵僅七千朱吳王時在江州命華高費聚等率三路兵往援伯昇夜刼其營諸軍皆潰其元帥劉成戰死耿炳文嬰城拒守伯昇圍城結九寨爲樓車下瞰城中運土石填濠渚放火舡燒水關城中晝夜應敵相拒月餘會常遇春兵至伯昇遂棄營引軍歸二十三年率六萬衆攻諸全新城城堅不可拔乃還後再與謝再興往攻爲持久計守將胡德濟堅壁拒守朱吳嚴州行省左丞李文忠來援與戰爲其所破將帥戰死者數人伯昇以數騎遁二十六年八月朱吳將徐達攻湖州伯昇以江浙行省平章守湖州先是達

吳王張士誠傳
敗吳王於皂林伯昇往援由荻港潛入城朱吳軍四面圍之丞相張士信以精兵十萬來援駐軍湖上舊館怯不敢進立柵以自固日夕攜妓歌舞蹴鞠爲戲敗於常遇春士信僅得遁去伯昇固守既久內則餉饋不繼外又援兵隔絕將士多有降者十月徐達徇所獲將士于城下城中大震並遣馮國勝語伯昇出降伯昇在城上語曰張太尉養我厚我不忍背之抽刃自殺爲左右抱持得不死左右謂伯昇曰事窮勢孤久困城中不如降伯昇俛首不能言其總管陳昧左丞張天騏以城降伯昇不得已亦降伯昇受張吳王恩最厚既降吳人憤其背德時以負主者口語輒謂曰李司徒朱吳王命仍守湖州吳王後敗於萬壽寺東街歸闔戶自經適徐達令伯昇往諭歸降伯昇驚前抱持之曰九四英雄患無身耳卽昇於舊盾上以舟送金陵明洪武元年以榮祿大夫平章政事兼同知詹事院事伯昇於明頗見任用後卒坐胡惟庸黨被誅

呂 珍 附湯全 張瑛

呂珍字敬夫

張紀事詩
云吳國寶

興化人其從士誠起兵也先至潘元紹父潘懋家懋妻戴氏見珍意

氣俶儻語懋曰客健者也何不引與晤張公乃偕之見士誠士誠大喜定刎頸交自高郵突圍

出擊敗元兵所謂十八騎者李伯昇潘元明外珍亦與焉珍善戰有智勇嘗以牛革囊兵宵濟襲朱吳軍又鎮越最久民物安堵朱吳師不敢侵以擒廖永安敗俞通海取安豐殺劉福通戰績甚夥珍不解文墨參軍陳庶子饒介之在吳王左右一日陳賦詩饒染翰題一紈扇以寄珍中有聞說錦袍酣戰罷不驚越女採荷花饒素負書名詩亦俊麗珍俾人讀罷忽大怒曰吾爲主人守邊疆萬死鋒鏑間豈務愛女子而不驚之耶見則必殺之珍誤以陳譏其務愛女子欲得而甘心焉初士誠受元官珍受行樞密院同僉事至正十六年率兵侵鎮江十一月朱吳將徐達破常州珍馳入常州督兵拒守因糧盡遂還十八年與李伯昇史文炳擊殺楊完者後爲左丞鎮紹興十月廖永安率舟師來戰於太湖乘勝深入爲所獲十九年圍諸全珍堰水以灌城胡大海率兵奪堰反灌珍軍珍于馬上折矢求解大海許之大海攻紹興總管張英恃勇輕進至城下遇伏爲珍所擒尋死珍每與大海戰令戰士及城中人爲歌高譟以詬大海紹興人王冕者不肯附珍詣大海獻計攻之然亦弗克大海圍城久不下引兵去珍作保越錄誇守城之功及降乃泯之二十三年攻劉福通於安豐死之二十四年浚常熟州之白茆港珍督役焉朱吳軍大舉攻湖州珍與五太子往救爲顧時薛顯所敗遂以舊館同五太子降未幾被殺于

湖城下

附 湯全張瑛皆總管隨呂珍將兵攻長興耿炳文禦之湯張俱戰死

朱英

朱英江陰石牌人號定一後改名錠與陳賢五江宗三等爲盜旣而宗三將謀殺英英就元廷招撫爲州判官州寮佐以英復謀反申江浙行省行省遣參政納麟哈刺討之英窮蹙渡江求救士誠士誠疑爲元兵說客按劍臨之辭拒不許往復數四英乃盛陳江南富饒且以妻子爲質士誠諾遣士德將三千人渡江以英爲嚮導擊橫柵以渡至福山時已逼歲除英曰兵貴神速常熟守臣雖已知分兵渡江今當除夕官民且耽醉飽必未有備乘間急趨之可立破夜半兵至九浙港士德尙疑之乃遣李伯昇將兵千人統朱英士兵直趨城中而自將大軍以英子清爲嚮導從虞山南入約明日合兵縣治十六年正月朔士德至墅橋朱清曰此去湖橋數里耳過此則湖山相逼林木繁茂不可不爲之備士誠卽令韓謙錢輔率兵先行至湖橋先是蜀人楊椿奉元將脫寅命來守常熟相機調遣與守臣謀不合別分兵伏虞山聞士誠渡江南行夜率將士趨湖橋伏其家廟及林木中以伺至是鼓譟出擊韓錢兵出不意不戰退走椿追擊

至小山頭士德聞變急趨救椿不敵回湖橋據山麓整軍以待士德仰戰三被流矢所中時伯昇已不血刃而下常熟城遣英以步卒來迎英望見兩軍相持疾馳擊破之椿敗走士德遂據常熟陷平江英以功署參政仍判江陰州事至正十七年朱吳將俞通海率水軍攻破石牌八月連破望亭新安十四日盡獲英海船十七日攻馬馱沙十八年四月又攻破石牌巫門子獲餘卒英至平江爲士誠行省平章卒葬薦福山脩竹塢俗呼朱平章墳英子清後與朱吳軍戰敗被獲不屈死

王與敬

王與敬淮西人以軍功官至元帥丙申春士德渡江以所部擊與敬於常熟兵潰欲退保姑蘇參政脫寅閉門不納乃抵嘉興苗軍參政楊完者欲殺之遂投松江謀結水寨於澱山諸湖令上戶供給其軍名曰守城實戀倡婦董賽兒也達魯花赤八都帖木兒知府崔思誠皆與不協越二日浙省又命元帥帖古列思等提兵鎮守二帥抗衡不相下又知帖古列思陰圖謀已于是有異志遣其屬戴列孫等自西門放火鼓譟而出官寮潰散檢括金帛自與敬以下人口輜重同時皆出俄楊完者令裨將蕭諒員成率苗軍突至與敬敗走北出通波塘歸降吳王卽授

威虜將軍偕史文炳復陷松江苗軍遁吳王據松江仍命與敬守之明年吳王納款于元與敬亦除同僉行樞密院事繼從士德提兵入杭州兵還不知所終

周 仁 墨談作周俛

周仁山陽鐵冶子吳人呼爲周鐵星資性深刻習吏事與張士德善任隆平郡太守士誠欲降元使者往返迄無就仁親詣江浙行省具陳自願休兵息民之意議始定朱吳軍圍姑蘇仁立柵以補城缺國亡被俘至金陵仁以聚斂功官至上卿長於理財當時國家律例刑章與田賦制度實仁所編訂也然不免苛酷故被誅日謂主者曰錢穀鹽鐵等籍皆在我汝國欲富當勿殺我主者怒曰亡國賊不知死罪尙敢言是耶速殺之吳人稱快或手額謝天曰今日天開眼也仁死楊維禎有周鐵星歌

陳保二軍大舍

陳保二常州奔牛壩人初聚衆以黃帕裹首號包頭軍朱吳將湯和下鎮江狗奔牛保二以衆降至正十六年糾合青軍元帥單居仁子單大舍歸降士誠李文忠哨杭州保二被獲檻送金陵不屈死蘇州破大舍亦被擒朱吳王付居仁自處之居仁曰不忠不孝當碎其肉縛市曹凌

遲死

潘 懋附子元明元紹

潘懋海陵人吳王張士誠居鄉時懋嘗從之游其妻戴氏謂其子元明曰此人豪也盍謹事之至正癸巳吳王舉兵江淮間懋首率元明居麾下戴氏內則綜家事給餉饋親製戰士之服外則撫士卒如己子人皆樂爲之用吳王旣據蘇江浙左丞呂珍來自興化懋與語大悅卽分授以兵使事楚國公俾居左右而屬任之二十五年吳王以爲榮祿大夫淮南行中書省右丞進封鄭國公戴氏封鄭國夫人無何懋卒於秦郵東郭戴氏後居於吳未幾亦卒

附 潘元明海陵人榮祿大夫潘懋之長子初爲鹽徒從士誠起義兵與李伯昇徐志堅史文炳並爲士誠腹心倚重甚至及士誠據有平江設官屬以元明爲中書左丞鎮吳興至正十六年元明將兵過吳江華嚴寺夜漏下二刻月中見浮屠上矢影取弓矢一發正中其顛舉軍皆賀十七年率兵攻長興屯上新橋爲朱吳將耿炳文所敗旣而以江浙行省平章鎮杭州二十六年十月朱吳王命朱文忠率師攻杭州元明卽遣員外郎方彜以狀送文忠狀曰嬰城固守乃受任之當爲歸款救民亦濟時之急務某自念起身草野叨任省樞非心慕

於榮華實志存於匡定豈意邦國殄滅王師見加事雖貴於見機名實同於歸義念是邦生靈百餘萬比年物故十二三今既入於職方當溥覃乎天澤謹將土地人民及諸司軍馬錢糧之數以獻凡得兵二十萬馬六百匹文忠至杭州元明與同僉李勝奉吳王所授行省樞密院浙西江東兩道廉訪司印並執蔣英劉震出降朱吳王命守原官食祿不署事子孫世襲指揮同知洪武十四年以元明署布政使司事後卒還葬鍾山之陰元明爲左丞時頗擅園亭之勝常譙文士分韻賦詩一時樂事江左慕之

潘元紹字仲昭潘懋次子吳王婿初元紹母戴氏見吳王而異之爲求婚焉於是王女隆安公主歸於潘人皆稱爲潘駙馬累官江浙行省左丞吳王倚爲腹心然元紹以國戚元勳位重宰相雖握兵干政而特能折節下士陳基宋克張羽盧熊陳汝言皆與之游徐達攻湖州元紹率赤龍船屯于平望爲呂珍等聲援常遇春縱火焚其赤龍舡夜擊之敗還嘗勸吳王治舟師爲航海計謂日本琉球皆可襲取此虬髯扶餘事業也吳王不能用姑蘇被圍既久累與朱吳軍決戰一日同徐義將兵潛出閶門欲掩襲之將奔遇春營遇春覺其至從北濠絕元紹歸路令王弼馳鐵騎縱擊大敗知事急召其妾七人謂曰我受國重寄義不顧家脫